

EDITORIAL

Rebolusyon an baton ha imperyalista nga gerra ngan pagpapakuri

Sinulod na ha ikatulo nga semana an gerra nga agresyon han imperyalismo nga US ngan Zionista nga Israel ha Iran, ngan natikahiluag pa ini ha iba nga nasud. Samtang natikaiha an gerra, nalandaw an ultimo nga katuyuanan han US nga mangagaw hin rekursong ngan merkado ha ngaran han paghakin han superganansya. Ha Pilipinas, prinsipal hini nga instrumento an rehimen Marcos agud ig-undong an imperyalista nga interes.

Naapektuhan na han gerra an pan-kalibutan nga merkado. Napiit an pan-kalibutan nga suplay han lana kahuman ig-serra han Iran an Strait of Hormuz, usa nga mayor nga aragian, agud depensahan an kalugaringon kontra ha US. Tungod ha tuyaw nga agresyon han US, naatubang an bug-os nga kalibutan ha grabe nga pan-ekonomiya ngan pampulitika nga krisis.

Layon ini nga inabat ha Pilipinas, nasud nga bagakolonyal ngan bagapyudal nga hul-os nga nasarig ha imported nga lana. Tikang han binuto an gerra, nagpatakas an mga hakog nga kartel han lana nga pahitas-on an presyo han mga produkto nga petrolyo. Nagresulta ini han paghitaas han gastos ha produksyon ngan transportasyon, ngan mas nagpadagmit ha pagmahal han pagkaon, kuryente, ngan iba pa nga batakan nga gastuson. Diri na mahunahunaan han milyun-milyon nga Pilipino kun tiunan-o babatunon an matag-adlaw nga panginahanglan. Nabagsak an lebel han panginabuhi bisan han mga maykaya. Nasusul-an hasta mga gudti nga negosyante ha pagdako han gastos ha produksyon.

Ha butnga han krisis, waray labot ha pag-inantos han katawhan an rehimen


Marcos. Napostura hiya nga waray mahimo ha dirudiretso nga pagmahal han lana; an tinuod, gatus-gatos kabilyon nga buhis an nakukuha tikang dinhi han gubyerno nga abrido para ha iya korapsyon. Murayaw hiya nga nakakahigda ha marahalon nga hotel ha iba nga nasud ngan nagpapakabida ha mga panhatag han sinsilyo nga ayuda, samtang nagdadamo an waray trabaho ngan nakukurian. Nagpapakabungul-bungol hiya ha natikakusog nga demanda nga tanggalon an mga buhis ha lana, pugngan an paghitaas han presyo han mga paplitan, ngan pahitas-on an suhol.

Tungod ha gerra ha Iran, mas nabubuksas ha bug-os nga kalibutan an makigerrahon nga kinaiya han US. Bis an mga na-

sud nga Germany, UK, Japan ngan iba pa nga alyado han US diniri nga ipatuman an panawagan ni Donald Trump nga magdeploy han ira pwersa militar kontra ha Iran. Dirudiretso an protesta han katawhan ha magkalain-lain nga nasud agud paundangon an terorista nga gerra han US.

Samtang ginkakangalsan han kalibutan an imperyalismo nga US, hul-os ini nga ginhahangkop ni Marcos. Ginhimo niya nga dako nga EDCA site an Pilipinas agud istakan han mga armas ngan tropa nga Amerikano. Ha luyo han panunulsol han US han gerra, padayon gihapon an pinakadako nga Balikatan ha Abril, ngan an 500 nga iba pa nga war exercises yana nga tuig, agud ayaton an karibal nga China. Padayon hiya nga napalit hin armas tikang ha US ngan Israel agud gamiton ha pasista nga panmuypoy ha katawhan nga nag-iinsister han demokrasya ngan tinuod nga kauswagan. Tuyo ni Marcos nga seguruhon an suporta han imperyalista nga amo labina na nga nahihimulag ngan gindidirian na han katawhan an iya rehimen.

Duguan an kamot han imperyalismo nga US ha pagsabrag han terorista nga gerra ha iba nga nasud, ngan ha Pilipinas nagseserbe nga papet hini an rehimen Marcos. Kinahanglan magkaurusa an katawhan Pilipino ngan maisugon nga magrebolusyon kontra ha imperyalista nga gerra ngan pagpapakuri han pasista ngan waray pulos nga rehimen Marcos. Kinahanglan nira butukon an mga organisasyon agud idemanda an pagpahitaas han suhol, pagbasura han mga pabug-at nga buhis, pag-



Programa nga amnestiya ni Marcos, usa nga epiko nga kapakyasan

Gintawag han Partido Komunista ng Pilipinas (PKP) komo usa nga epiko nga kapakyasan ngan buaw nga pasalida an ginpatuman han rehimen Marcos nga duha katuig nga aplikasyon para ha amnestiya. Kasunod ini han paghuman han dedlayn han aplikasyon hadton Marso 13, diin ginpahayag han National Amnesty Commission nga nakakarawat ini hin yukut-yukot nga aplikasyon tikang ha "hadto anay rebelde ngan tagsuporta" han rebolusyunaryo nga kagiusan.

"Pakyas an programa nga amnestiya ni Marcos nga uwaton an Partido, an masa ngan an ira mga rebolusyunaryo nga pwersa," sering ni Marco Valbuena, puno nga upisyal ha impormasyon han PKP. Kadam-an ha nasering nga ihap mga ordinaryo nga parag-uma ngan mga kablas nga sibilyan nga nauwat ngan napiritan nga sumurender ngan mag-aro hin amnestiya.

Pira la ha mga nagpailarum ha amnestiya an "kontrarebolusyunaryo nga traydor." Mga binaydan hira nga ahente han Armed Forces of the Philippines, Philippine National Police, ngan National Task Force-Elcac nga nag-aro hin pasaylo ha mga pasista kabalyo han pagtraydor ha nasyunal-demokratiko nga kawsa han katawhan ngan ha hinumduman han mga martir.

Ginbuksas liwat ni Valbuena kun tiunan-o ginhi-mo nga aragian han korapsyon han rehimen Marcos an programa nga amnestiya hini pinaagi han mga *local amnesty board*. Mayda bilyun-

bilyon kapiso liwat nga ginbuhos ha mga "barangay development program" nga libre ha pag-awdit ngan ginkokorap la han mga burukrata ngan upisyal militar.

Nanindugan hi Valbuena nga pak-yas an amnestiya ngan militarista nga daup han rehimen nga paluyahon an determinasyon han rebolusyon. "Nagsasayop hi Marcos ha paghuna-huna nga mapeperdi han terorismo han estado an ungara han katawhan ngan puuhon an ira pag-ato." Dugang la hini nga ginpupukaw an katawhan nga ig-insister an ira mga katungod ngan kumatin hin armas para umato.

Ha Eastern Visayas, tikang Disyembre 2025 todo-larga an mga yunit han 8th Infantry Division at Police Regional Office-8 ha pagsapubliko han mga "pagpapasurender," "seremonya han pag-aro hin amnestiya," ngan iba pa nga pakulo. Kundi nakasering mismo ha ira mga anunsyo nga mga parag-uma o maiha na nga diri aktibo ha kagiusan an kunuhay "sumurender."



Welga kontra ha paghitaas han presyo han lana, ginlansar

KAUSA AN magkalain-lain nga sektor, ginlansar han mga drayber han dyip ha pangunguna han grupo nga Pagkakaisa ng mga Samahan ng Tsuper at Opereytor Nationwide (PISTON) an nasyunal nga welga hadton Marso 19-20 kontra ha waray wantas nga paghitaas han presyo han mga produkto nga petrolyo.

Ginhimo nira an welga ha magkalain-lain nga parte han nasud. Ha Metro Manila, gindara nira an protesta tubtub ha Mendiola kaupod an mga grupo han kabatan-unan. Sigon ha PISTON, mapan-insulto na ngani an ginproponer nga ₱1 nga umento ha pamasashe, ginbawi pa ini ni Ferdinand Marcos Jr. Samtang, diri hini ginkokontrol an paghakahog ha ganansya han mga kompaniya nga Shell, Caltex ngan Petron nga ginsisingabot an krisis.

Sobra-sobra na an paghimakuri han mga drayber. Inabot na yana nga semana ha ₱120/litro an presyo han *diesel*, sanglit linobo na ha ₱3,600 kada adlaw an ira gastos para makapamasada. Aada naman ha ₱7,200 an gastos han mga drayber han "moderno nga dyip." Klaro nga kulang an ₱5,000 nga ayuda nga ginpapanhatag han gubyerno nga yana limitado pala ha Manila. Dugang nga pakuri pa an "4-day work week" nga nag-iiban ha ira mga pasahero ngan nagpapagal ha mga trabahador.

Gin-iinsister han PISTON ngan mga progresibo nga grupo an layon nga pagtanggap han *value-added tax* ngan *excise tax* ha lana agud maibanan hin ₱20/litro an presyo han krudo, ngan kuhaon an "mawawara nga kita" ha *pork barrel* ngan *confidential and intelligence funds*. Panawagan liwat nira an pagpapahitaas han nasyunal nga minimum nga suhol ha ₱1,200 ngan pagpabasura ha Oil Deregulation Law. **L**

"Ipakigbisog...", "tikang ha paypay 1

papahimubo han presyo han mga paplition, talwas nga pagpapakabuhi labina ha kabaryuhan, ngan pagrespeto ha ira mga katungod. Kinahanglan atuhan an panmilitar nga panginginlabot han US ngan an pagpapabuto hini han gerra para ha

kalugaringon nga interes.

Hinog kaupay an sitwasyon para pukawon an rebolusyunaryo nga ungara han katawhan Pilipino. Ha butnga han natikagrabe nga pankalibutan nga kasamok, natatagan hira hin paglaum han ira armado nga pwersa, an Bagong

Hukbong Bayan, nga amo an mapagdesisyon nga mapukan ha papet nga estado ngan ha paghahadi han imperyalismo nga US. Ini an makasaysayan nga papel nga igsasalin-uog nira ha tiarabot nga ika-57 nga anibersaryo han tinuod nga hukbo han katawhan. **L**